

**S'assessora rezionale a sa Sanidade Simona De Francisci: una ghera contra a su tempus pro issirrinire s'apretu de sa Peste Suina e de sa Febbre de su Nilo e cumpretare sos disinnos abarrados firmos dae tempus.**

Dinàmica e tusturrada, cun una galavera chi a sa sola diat bastare pro fàghere iscopiare unu sistema cun règulas chi su bonu de sas bortas sunt tropu astrintas, s'assessora noa a sa Sanidade Simona De Francisci, est faghende sa pelea sua. In antis de totu contra a su tempus. At atzetadu cun ispantu e riconnoschèntzia s'incàrrigu chi l'at dadu su presidente Cappellacci chi cando at dèpidu torrare a fàghere sa Zunta, ca su Tar at nadu chi non fiat lezìtima pro non b'aeret unu tantu mìnimu de fèminas, l'at seberada pro ghiare un'assessoradu gosi complessu. Postu a bandas pro como su traballu de giornalista, s'assessore no ismènticat sa zente comuna e como chi est colada a sàtera banda ponet aficu pro parare fronte a s'apretu e cumpretare unos cantos disinnos pro tropu annos abarrados firmos comente a sa banca de su sàmbene cordonale. De Francisci cheret torrare impostas cuncretas in presse e bi l'est ponende totu pro mantènnere finas in sa politica sos tempos astrintos de sa televisione. E gasi apenas est arribada at dèpidu parare fronte a problemas mannos de sa sanidade animale, mescamente sa Peste Suina e sa Febbre de su Nilo. "No apo isetadu chi esseret capitadu cussu chi est capitadu in Lanusè – at nadu s'assessora a sa Sanidade Simona De Francisci – dae deretu apo dadu sa prioridade a unu pranu de eradicatzione de sa Peste Suina. Ma non podimus fàghere totu a sa sola. Cherimus fàghere cumprèndere a sos pastores chi nos depent azuare e chi depent acunsentire a unu sistema de règulas nou. Intantu pro gherrare custa pelea chi dae prus de trint'annos ponet in arriscu su settore suinìcolu sardu, amus amaniadu una truma interassessoriale Sanidade, Ambiente e Agricoltura, pro coordinare e traballare paris pro parare fronte a custa chistione. Finas pro sa Febbre de su Nilo est de importu mannu unu pranu de controllu e de eradicatzione – sighit De Francisci – a prus de sas bonificas, comente atu de programatzione, amus cumintzadu paris cun s'assessoradu a s'Ambiente unu sistema chi no at a pònnere a bandas sa comunicatzione. A prus de unu vademecum chi est essidu custa dies coladas in sos ziornales, amus a dare àteras noas finas in sos ambulatòrios de meighina zenerale. Oe disponimus de unu sistema veterinàriu bonu chi est faghende unu traballu mannu in totue. Bisonzat de aumentare sos controllos. A dolu mannu no nde mancat mai – sighit s'assessora – e non podimus controllare totu". In su 2011 b'at àpidu 22 casos de peste suina africana. Oe su de non pòdere zùghere a foras de Sardinna sa peta sarda arriscat de pònnere in grughe sa zootecnia sarda e totu su chi li zirat in tundu. Subra 15.000 aziendas suinìcolas chi b'at in Sardinna (inue si

pesant 180.000 porcos), 5 ant s'acreditamentu HBLH e 400 sunt in règula cun totu sa normas. Sunt aziendas tzertificadas francas dae sa Peste Suina e chi ant livellos de calidade gasi artos chi sunt finas prus mannos cunforme a su mìnimu chi pedit sa leze. Sas 400 aziendas traballant rispetende de su totu sa biosicuresa, sa rintratziabilidade de su produktu e de sa filiera. Ant seberadu de atzetare sos controlos e sas règulas, pro garantire sa calidade de sa peta sarda e de chie la comportat, ant duncas su deretu de pòdere sighire a traballare. "Su ministru de sa Salude Fazio – narat De Francisci – at torradu a nàrrere chi 17 miliardos de èuros pro sas esportatziones sunt firmos pro curpa de sa Sardinna. A su ministru apo pedidu de non nos pònnere a bandas e de nos dare galu tempus, si nono amus a èssere prontos a fàghere sa pelea nostra". Ite at a capitare a pustis chi sa sotziedade Agrolip Sarda at tancadu? S'impiantu de ismaltimentu at a dèvere isettare 30 dies in antis de pòdere torrare a traballare. In austu sos Nas aiant atrobadu 3000 metros cubos de ispinnios oramai pùdidos. Sos Nas e su Noe ant atrobadu àteras infratziones sanitàrias e ambientales in sas pagas dies a como e ant firmadu s'istabilimentu de Macchiareddu. "Como chi ant tancadu s'ùnicu istabilimentu de ismaltimentu ca non fiat in règula – at nadu s'assessora a sa Sanidade – tocat de pessare a àteras solutziones pro parare fronte siat s'ordinàriu siat s'istrazordinàriu".